



Broj:01-02-2955/19-4  
Ilidža, 29.08.2019.godine

Na osnovu člana 2. stava 3. Zakona o javnim priznanjima Kantona Sarajevo – Novi prečišćeni tekst („Službene novine Kantona Sarajevo“ broj 2/10) i člana 28. Statuta Općine Ilidža – Prečišćeni tekst („Službene novine Kantona Sarajevo“, broj 33/10, 18/16), Općinsko vijeće Ilidža na 29. redovnoj sjednici održanoj dana 29.08.2019 godine, donijelo je

## ODLUKU

o izmjeni i dopuni Odluke o priznanjima Općine Ilidža

### Član 1.

U Odluci o priznanjima Općine Ilidža („Službene novine Kantona Sarajevo“, broj 51/18) član 4. stav (1) tačka d) podtačka 2) mijenja se i glasi:

„2) Da je lice obuhvaćeno članom 2. Zakona o pravima branilaca i članova njihovih porodica (Službene novine FBiH, broj 33/04, 56/05, 70/07, 9/10, 90/17) a koje je imalo prebivalište ili boravište na području Općine Ilidža u periodu od 06.04.1992. do 23.12.1996.godine“, kao i poginula lica iz navedenog člana Zakona koja su učestvovala u odbrani BiH“.

### Član 2.

Iza člana 10. dodaje se član 11. koji glasi:

#### „Član 11.

(Pravilnik o načinu izbora kandidata za dodjelu priznanja)

Općinsko vijeće će donijeti Pravilnik o načinu izbora kandidata za dodjelu priznanja Općine Ilidža“.

Dosadašnji član 11. postaje član 12.

### Član 3.

Ova Odluka stupa na snagu osmog dana od dana objavljivanja u „Službenim novinama Kantona Sarajevo“.

DOSTAVLJENO.

1. Općinski načelnik
2. Služba za opću upravu
3. Služba za finansije
4. Služba za zajedničke poslove
5. Komisija za saradnju sa drugim općinama, nagrade, priznanja,
6. praznike i obilježavanje značajnih događaja i ličnosti
7. Za objavu „SNKS“
8. Evidencija
9. a/a

PREDSJEDAVAJUĆI

**Muhamed Omerović**





Broj: 01-02-5323/18-5  
Ilidža, 29.11.2018.godine

Na osnovu člana 2. stava 3. Zakona o javnim priznanjima Kantona Sarajevo – novi prečišćeni tekst («Službene novine Kantona Sarajevo», broj 2/10) i člana 28. Statuta Općine Ilidža - Prečišćeni tekst («Službene novine Kantona Sarajevo», broj 33/10, 18/16), Općinsko vijeće Ilidža na 20. redovnoj sjednici održanoj dana 29.11. 2018.godine, *donijelo je*

## **O D L U K U O PRIZNANJIMA OPĆINE ILIDŽA**

### **Član 1. (Predmet odluke)**

- (1) Ovom odlukom, utvrđuju se priznanja Općine Ilidža koja se dodjeljuju pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine.
- (2) Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine.
- (3) Priznanja se mogu dodjeljivati i posthumno pojedincima, u skladu sa kriterijima iz člana 4. stav 1. tačka b., c. i d.

### **Član 2. (Vrste priznanja)**

- (1) Priznanja u smislu ove odluke su:
  - a) Povelja počasni građanin/građanka općine Ilidža
  - b) Povelja za životno djelo
  - c) Zlatna plaketa
  - d) Srebrna plaketa
  - e) Zahvalnica
  - f) Plaketa odbrane
- (2) U jednoj kalendarskoj godini istoj fizičkoj ili pravnoj osobi može se dodijeliti samo jedno priznanje Općine.
- (3) O vrsti i dobitnicima priznanja odlučuje Općinsko vijeće Ilidža.

### **Član 3. (Oblik i izgled priznanja)**

- (1) Priznanja, kao idejno, grafičko i izvedbeno rješenje sadrže prepoznatljive motive prirodnih ljepota općine Ilidža u okvirnom dijelu, sa tekstom: „Bosna i Hercegovina, Federacija Bosne i Hercegovine, Kanton Sarajevo, Općina Ilidža, Općinsko vijeće sa grbom općine centriranim na vrhu stranice.
- (2) Izbor idejnog rješenja priznanja vrši Općinski načelnik u saradnji sa Komisijom za saradnju sa drugim općinama, nagrade, priznanja, praznike i obilježavanje značajnih događaja i ličnosti (u daljem tekstu: Komisija).



(3) Priznanja se štampaju na formatu A3 i dodjeljuju se u svečanom povezu.

#### **Član 4.** **(Kriteriji za dodjelu priznanja)**

(1) Priznanja iz člana 2. ove odluke dodjeljuju se prema sljedećim kriterijima:

**a) Povelja počasni građanin/građanka općine Ilidža**

- 1) Počasnim građaninom/građankom općine Ilidža može biti proglašen državljanin BiH koji nema prebivalište na području općine Ilidža koji je svojim naučnim, kulturnim, humanitarnim ili drugim radom, te naročitim zaslugama doprinio ugledu ili napretku općine Ilidža i njenom razvoju.
- 2) Počasnim građaninom/građankom općine Ilidža može biti proglašen i državnik ili funkcioner druge države, član međunarodne organizacije, odnosno organizacije druge države ili njihovih tijela koji je posebno zaslužan za općinu Ilidža i državu Bosnu i Hercegovinu u promicanju njenog suvereniteta, samostalnosti i identiteta na opšteprihvaćenim demokratskim načelima.
- 3) Imenovanje počasnim građaninom/građankom znak je počasti i ne daje nikakva posebna prava.
- 4) Počasnom građaninu/građanki ne dodjeljuju se druga javna priznanja općine Ilidža.

**b) Povelja za životno djelo**

- 1) Povelja za životno djelo dodjeljuje se za cjelovito djelo koje je pojedinac, državljanin Bosne i Hercegovine sa prebivalištem na području općine Ilidža ostvario u toku svog radnog i životnog vijeka, koje predstavlja izuzetan i vrijedan doprinos razvoju i ugledu općine Ilidža iz sljedećih oblasti: nauke, kulture, umjetnosti, vaspitanja i obrazovanja, zdravstva i socijalne zaštite, privrede, tehničke kulture, sporta, zaštite i unaprijeđenja životne sredine, poljoprivrede i drugih javnih djelatosti.

**c) Zlatna plaketa, Srebrna plaketa i Zahvalnica**

- *kolektivima koji su:*

- 1) ostvarili izuzetne rezultate u radu;
- 2) ulagali u proširenje proizvodnih kapaciteta;
- 3) postigli izuzetne rezultate u oblasti nauke, kulture, prosvjetne djelatnosti, vjerskog života, sporta, zdravstva, bezbjednosti, razvoju komunalne infrastrukture, zaštiti radne i prirodne sredine i razvoju dobrih međuljudskih odnosa;
- 4) dali izuzetan doprinos u ostvarivanju prava građana;
- 5) doprinijeli poboljšanju uslova rada i života u MZ na području općine Ilidža;
- 6) doprinijeli međunarodnoj promociji Općine Ilidža;
- 7) dali izuzetan doprinos u drugim područjima života i rada.

- *pojedincima koji su:*

- 1) inovatori na tehničkim i drugim unapređenjima;
- 2) doveli u opasnost svoj život spašavajući druge osobe i materijalna dobra;
- 3) kao donatori humano postupali prema pojedincima ili kolektivima;
- 4) posebno doprinijeli razvoju lokalne samouprave u MZ, općini i poboljšanju uslova života građana;



- 5) uspješno organizovali organe MZ i udruženja, te doprinijeli njihovom radu;
- 6) postigli izuzetne rezultate u oblasti poljoprivredne proizvodnje;
- 7) ostvarili posebne rezultate u sportu, vaspitno-obrazovnom radu, naučnom radu, umjetnosti i kulturi, na međunarodnom, državnom i federalnom nivou;
- 8) dali izuzetan doprinos u drugim područjima života i rada,

#### d) Plaketa odbrane

- 1) Plaketa odbrane dodjeljuje se kao posebno priznanje općine Ilidža za doprinos u Odbrani općine Ilidža, kao i organizaciji života i rada građana u ratnim uslovima, kao i ratnim jedinicama i štabovima koji su se istakli u odbrani, pod uslovom:
- 2) da je pripadnik oružanih snaga imao prebivalište ili boravište na području Ilidže u periodu 06.04.1992.-23.12.1996. godine, a koji je stupio u pripremu i odbranu države od 18.09.1991.-31.12.1991. godine i ostao neprekidno do 23.12.1995. godine, ili je ranije demobilisan od nadležnih vojnih organa;
- 3) da je kandidat postigao izuzetne rezultate u odbrani Ilidže;
- 4) Plaketa se može dodijeliti pripadniku oružanih snaga koji u toku rata nije imao prebivalište na području Ilidže, ali je dao izuzetan doprinos u organizovanju oružanih snaga u odbrani teritorije Ilidže;
- 5) za svakog kandidata koji se predlaže, potrebno je dostaviti dokaz o posjedovanju ratnog priznanja, odlikovanja i dr.

### **Član 5. (Broj dodijeljenih priznanja)**

Godišnje se može dodijeliti jedna Povelja počasni građanin/građanka općine Ilidža, jedna Povelja za životno djelo, jedna Zlatna plaketa pojedincima i jedna Zlatna plaketa kolektivima, dvije Srebrene plakete pojedincima i dvije Srebrene plakete kolektivima, pet Zahvalnica, kao i jedna Plaketa odbrane.

### **Član 6. (Ograničenja za dodjelu priznanja)**

- (1) Priznanja se ne mogu dodijeliti kolektivima ili pojedincima kojim su ista dodijeljena u posljednjih pet godina.
- (2) Priznanja se ne mogu dodijeliti uposlenicima Općine Ilidža za rezultate ostvarene u obavljanju poslova predviđenih opisom radnog mjesta.
- (3) Izabranim zvaničnicima svih nivoa vlasti u Bosni i Hercegovini za vrijeme trajanja mandata.
- (4) Licima koji su pravosnažnom presudom domaćeg ili stranog suda osuđena na zatvorsku kaznu za krivična djela.
- (5) Licima koji svojim djelovanjem narušavaju ugled općine.
- (6) Priznanja se ne mogu dodijeliti kolektivima:
  - a) prema kojima se vodi stečajni i likvidacijski postupak;
  - b) koji imaju neizmirene obaveze po osnovu direktnih poreza prema nadležnoj poreznoj upravi FBiH osim ako dostave validan dokaz o reprogramu duga;
  - c) koji imaju neizmirene obaveze po osnovu indirektnih poreza premanadležnog upravi za indirektno oporezivanje BiH, osim ako dostave validan dokaz o reprogramu duga, odnosno dokaz da nisu u sistemu PDV-a.
  - d) koji su propustili ispuniti finansijske obaveze prema općini Ilidža.



**Član 7.**  
**(Javni poziv za dodjelu priznanja)**

- (1) Općinsko vijeće odlukom raspisuje Javni poziv za predlaganje kandidata za dodjelu priznanja Općine Ilidža.
- (2) Odluka o raspisivanju Javnog poziva sadrži vrstu priznanja, mjesto oglašavanja, kriterije za dodjelu priznanja, ovlaštene predlagače iz ove odluke koji mogu podnijeti prijedloge za dodjelu priznanja i rok za podnošenje prijedloga za dodjelu priznanja.
- (3) Javni poziv se objavljuje najkasnije 90 dana prije održavanja svečane sjednice Općinskog vijeća povodom Dana Općine.
- (4) Prijedlozi za dodjelu priznanja dostavljaju se Komisiji.

**Član 8.**  
**(Ovlašteni predlagači)**

- (1) Prijedloge za dodjelu priznanja mogu podnositi građani pojedinci, udruženja građana, savjeti mjesnih zajednica, političke partije, vijećnici Općinskog vijeća Ilidža, Općinski načelnik, ustanove i drugi organi i organizacije sa područja općine Ilidža.
- (2) Prijedlog za dodjelu priznanja mora biti pismeno obrazložen i sadržavati sljedeće:

*a) za pojedince*

- 1) biografiju kandidata
- 2) tok njegovog rada i ostvarenih rezultata
- 3) temeljito obrazloženje i razlog predlaganja
- 4) naziv javnog priznanja i područje za koje se podnosi prijedlog.

*b) za pravne osobe*

- 1) osnovne podatke o organizaciji djelatnosti
  - 2) ostvarene rezultate rada
  - 3) temeljito obrazloženje razloga predlaganja
  - 4) naziv javnog priznanja i područje za koje se podnosi prijedlog
- (3) Uz prijedlog se prilaže dokumentacija u zavisnosti od vrste priznanja za koje se podnosi prijedlog.
- (4) Prijedlog za dodjelu priznanja sa potpunom dokumentacijom se podnosi u pisanoj i elektronskoj formi Komisiji putem Centra za pružanje usluga građanima.

**Član 9.**  
**(Odluka o dodjeli priznanja)**

- (1) Komisija je dužna da razmotri sve dostavljene prijedloge za dodjelu priznanja i Općinskom vijeću dostavi izvještaj o pristiglim prijavama sa prijedlozima dobitnika priznanja.
- (2) Općinsko vijeće na osnovu izvještaja Komisije iz stava (1) ovog člana donosi odluku o dodjeli priznanja Općine Ilidža.



**Član 10.**  
**(Opoziv priznanja)**

- (1) Priznanja dodijeljena u skladu sa ovom odlukom mogu se opozvati ako se dobitnik priznanja pokaže nedostojnim priznanja.
- (2) Opoziv priznanja vrši se na način i po postupku za dodjelu priznanja.
- (3) Priznanje će biti opozvano ako se naknadno utvrde ograničenja utvrđena u članu 6. ove odluke.
- (4) U postupku opoziva priznanja, Stručna služba za poslove Općinskog vijeća može pribaviti dokaze u skladu sa članom 6. ove odluke.

**Član 11.**  
**(Stupanje na snagu)**

Ova odluka stupa na snagu osmog dana od dana objavljivanja u "Službenim novinama Kantona Sarajevo".

Stupanjem na snagu ove odluke prestaje da važi Odluka o priznanjima općine Ilidža (Službene novine Kantona Sarajevo" broj: 36/10 i 1/14).

PREDSJEDAVAJUĆI

**Muhamed Omerović**

**DOSTAVLJENO:**

1. Općinski načelnik
2. Služba za opću upravu
3. Služba za finansije
4. Služba za zajedničke poslove
5. Komisija za saradnju sa drugim općinama, nagrade, priznanja, praznike i obilježavanje značajnih događaja i ličnosti
6. Za objavu „SNKS“
7. WEB stranica općine Ilidža
8. Evidencija
9. a/a



